

## SKIPULAGSSKRÁ fyrir sjálfseignarstofnunina Fjölsmiðjan.

### 1. gr.

#### *Nafn og staða.*

Fjölsmiðjan er sjálfseignarstofnun sem starfrækir verkþjálfunar- og framleiðslusetur skv. þessari skipulagsskrá sem staðfest er af dóms- og kirkjumálaráðuneytinu.

Fjölsmiðjan á lögheimili og varnarþing í Reykjavík.

Stofnendur eru: Félagsmálaráðuneytið/Vinumálastofnun, Rauði kross Íslands, Reykjavíkurborg og önnur sveitarfélög innan Samtaka sveitarfélaga á höfuðborgarsvæðinu sem jafnframt hafa skuldbundið sig til að leggja til árlegt framlag til Fjölsmiðjunnar skv. þessari skipulagsskrá og aðrir sem gerast stofnendur fyrir árslok 2003.

### 2. gr.

#### *Markmið og þátttakendur (í verkþjálfun).*

Fjölsmiðjan býður bæði verkþjálfun og fræðslustarfsemi ungu fólki á aldrinum 16-24 ára. Jafnframt eiga einstaklingar 25 ára eða eldri aðgang að Fjölsmiðjunni ef þeir teljast hafa sérstaka þörf fyrir aðstoð á þessu sviði.

Markmiðið er að þroska persónuleika einstaklinganna og búa í haginn fyrir þá til aukins skólanáms eða þátttöku á hinum almenna vinnumarkaði.

### 3. gr.

#### *Skipulag og inntak.*

Fjölsmiðjan skal gefa kost á hagnýtri vinnu, framleiðslu og fræðilegri þjálfun sem tengist þeim þáttum. Fagleg verkþjálfun skal vera ríkur þáttur í starfsemi og tengjast hinni hagnýtu vinnu. Einnig skal fara fram grunnfræðsla um samfélagið og starfsemi opinberra og einkaaðila.

Fjölsmiðjan skal ennfremur gefa þeim sem þess þurfa kost á fræðslu sem styrkir þá menntun sem þeir hafa þegar áunnið sér.

### 4. gr.

#### *Starfsáætlun.*

Árlega skal forstöðumaður gera starfsáætlun fyrir næsta starfsár. Starfsáætlunin skal vera í samræmi við þau markmið og skipulag sem um getur í greinum 2 og 3 í þessari skipulagsskrá og innihalda skriflega lýsingu á þeim markmiðum, undirbúningsstarfi og málaflokkum sem unnið skal að á starfsárinu ásamt lýsingu á verkþjálfun og framleiðslustarfsemi.

### 5. gr.

#### *Stofnfé.*

Stofnfé er samtals kr. 20.000.000 og greiðir Rauði kross Íslands kr. 10.000.000 og félagsmálaráðuneytið/Vinumálastofnun kr. 10.000.000.

Af stofnfé eru kr. 570.000 óskerðanlegt stofnfé sem ávaxta skal með tryggilegum hætti.

### 6. gr.

#### *Stjórn.*

Stjórn Fjölsmiðjunnar er æðsta stjórn hennar og ber ábyrgð á fjárvörslu stofnunarinnar.

Í stjórninni eiga sæti 7 manns og tilnefna eftirfarandi aðilar einn mann hver:

Félagsmálaráðuneytið  
Vinnumálastofnun  
Menntamálaráðuneytið  
Reykjavíkurborg  
Samtök sveitarfélaga á höfuðborgarsvæðinu S.S.H.  
Rauði kross Íslands  
Rauða kross deildir á höfuðborgarsvæðinu.

Sömu aðilar skulu tilnefna varamann fyrir hvern stjórnarmann.

Stjórnarmenn skulu tilnefndir til tveggja ára.

Í fyrstu stjórn skal helmingur stjórnarmanna tilnefndur til eins árs.

Fyrir setu í stjórn skal greiða þóknun skv. ákvörðun stjórnar.

Fulltrúar í stjórn skulu vera lögráða.

Stjórnarfundir skal að jafnaði halda mánaðarlega.

#### 7. gr.

##### *Hlutverk stjórnar.*

Stjórnin annast yfirstjórn Fjölsmiðjunnar. Hún ber ábyrgð á að skipulagsskrá Fjölsmiðjunnar sé í gildi höfð og að aðrar settar reglur séu haldnar.

Stjórnin yfirfer og samþykkir árlega starfsáætlun forstöðumanns um starfsemi Fjölsmiðjunnar, sem skal vera í samræmi við 2. og 3. gr. skipulagsskrárinnar.

Stjórnin staðfestir reglur um val þátttakenda skv. tillögum forstöðumanns.

Stjórnin staðfestir fjárhagsáætlun Fjölsmiðjunnar skv. tillögum forstöðumanns og staðfestir ársreikninga.

Stjórnin ræður forstöðumann og veitir honum lausn frá starfi.

Stjórnin ræður leiðbeinendur og annað starfsfólk og veitir því lausn frá starfi. Stjórnin getur veitt forstöðumanni Fjölsmiðjunnar umboð til slíkra starfa.

#### 8. gr.

##### *Skuldbindingar Fjölsmiðjunnar.*

Leyfi til að undirrita skuldbindingar fyrir Fjölsmiðjuna hafa stjórnarformaður og forstöðumaður Fjölsmiðjunnar saman. Stjórnin getur veitt forstöðumanni Fjölsmiðjunnar umboð til að skuldbinda Fjölsmiðjuna fjárhagslega hvað varðar daglegan rekstur.

Ákvarðanir varðandi kaup og sölu á eignum Fjölsmiðjunnar skal leggja fyrir stjórnina til ákvörðunar.

Samþykki 2/3 hluta stjórnar þarf varðandi kaup eða sölu á eignum Fjölsmiðjunnar. Sala og veðsetning fasteigna Fjölsmiðjunnar er háð samþykki dómismálaráðherra.

#### 9. gr.

##### *Skipulag stjórnar.*

Í fyrstu stjórn Fjölsmiðjunnar verður sá sem tilnefndur er af Rauða krossi Íslands formaður stjórnar en að loknu fyrsta kjörtímabili velur stjórnin sér sjálf formann og varaformann.

Stjórnin setur sér sjálf verklagsreglur.

Stjórnin getur boðið aðilum utan stjórnar að taka þátt í umræðum um afgreiðslu einstakra mála – eftir atvikum.

Forstöðumaður tekur þátt í fundum hennar án atkvæðisréttar.

## 10. gr.

*Forstöðumaður Fjölsmiðjunnar.*

Forstöðumaðurinn ber uppeldisfræðilega og rekstrarlega ábyrgð á Fjölsmiðjunni gagnvart stjórninni.

Forstöðumaðurinn annast daglega stjórnun og rekstur og ber ábyrgð á fjármálum gagnvart stjórn Fjölsmiðjunnar. Forstöðumaður skal jafnframt tryggja framkvæmd á framleiðslu og fræðslu í starfi Fjölsmiðjunnar samkvæmt skipulagsskrá og öðrum gildandi reglum.

## 11. gr.

*Fjármál, fjárhagsáætlanir og reikningsskil.*

Tekjur Fjölsmiðjunnar eru: Þáttökugjöld frá Vinnumálastofnun (Atvinnuleysistryggingasjóði), frá Rauða krossi Íslands, frá sveitarfélögum sem eru stofnendur Fjölsmiðjunnar, frá menntamálaráðuneytinu og tekjur af sölu á framleiðsluafurðum Fjölsmiðjunnar. Þáttökugjöld frá hverju og einu sveitarfélagi skal ákveða fyrir hvert fjárhagsár sem hlutfall af höfðatölu þátttakenda frá viðkomandi sveitarfélögum.

Verkþjálfunar- og námsstyrkur til þátttakenda skv. 2. gr. eiga að miðast við atvinnuleysisbætur á hverjum tíma. Atvinnuleysistryggingasjóður greiðir verkþjálfunar- og námsstyrk þeirra sem eru á atvinnuleysisbótum, sveitarfélögin greiða verkþjálfunar- og námsstyrk þeirra er njóta félagslegra bóta frá þeim og Rauði kross Íslands og deildir hans á höfuðborgarsvæðinu greiða verkþjálfunar- og námsstyrk til þeirra sem eru á aldrinum 16-18 ára og njóta ekki atvinnuleysisbóta eða framlaga frá sveitarfélögum.

Forstöðumaður Fjölsmiðjunnar leggur árlega fram fjárhagsáætlun sem skal samþykkjast af stjórninni.

Reikningsár Fjölsmiðjunnar er almanaksárið. Eigi síðar en 30. júní ár hvert skal senda Ríkisendurskoðun ársreikning Fjölsmiðjunnar fyrir næstliðið ár ásamt skýrslu um hvernig fé stofnunarinnar hefur verið ráðstafað á því ári. Ársreikningarnir skulu endurskoðaðir skv. ákvörðun stjórnarinnar af löggiltum endurskoðanda.

Endurskoðandi staðfestir upplýsingar til kröfu á framlagi til Fjölsmiðjunnar frá einstökum aðilum að rekstri Fjölsmiðjunnar skv. gildandi reglum þar um.

Ársreikningarnir skulu uppsettir og endurskoðaðir skv. reglum ríkisendurskoðunar.

## 12. gr.

*Stuðningshópar (vinafélag).*

Forstöðumaður skal hafa frumkvæði að því að mynda stuðningshóp til stuðnings Fjölsmiðjunni.

Inn í slíkan hóp er æskilegt að velja einstaklinga eða fyrirtæki sem með fjárframlögum eða sérfræðipækkingu geta stuðlað að því að ná sem best fram markmiðum Fjölsmiðjunnar. Félagar í stuðningshópnum skulu boðaðir til fundar af forstöðumanni Fjölsmiðjunnar minnst einu sinni á ári.

## 13. gr.

*Breytingar á skipulagsskrá.*

Skipulagsskrá má breyta ef 2/3 hlutar stjórnar samþykkja slíkt á tveimur stjórnarfundum. Þá stjórnarfundum skal halda með eigi minna en tveggja vikna millibili. Breytingar skulu staðfestar af stofnendum skv. 6. gr. og að fengnu samþykki dómsmálaráðherra.

## 14. gr.

*Lok rekstrar.*

Starfsemi Fjölsmiðjunnar verður lögð niður ef 2/3 hlutar stjórnar eru því samþykkir. Samþykki dómsmálaráðherra skal fengið áður en Fjölsmiðjan er lögð niður. Á tveimur stjórnarfundum sem haldnir eru með minnst tveggja vikna millibili skal staðfesta þá ákvörðun.

Ákvörðunin skal staðfest af þeim aðilum sem eru stofnendur að Fjölsmiðjunni skv. 6. gr. skipulagsskrár.

Sé Fjölsmiðjan lögð niður skal stjórn hennar ráðstafa eignum í sama tilgangi og Fjölsmiðjan hefur starfað, sbr. 6. gr. laga nr. 19 5. maí 1988 að fengnu samþykki stofnenda.

Einnig skal leita umsagnar Ríkisendurskoðunar sbr. 6. gr. laga nr. 19 5. maí 1988. Stjórnin skal við niðurlagningu Fjölsmiðjunnar starfa þar til öllum formlegum frágangi fjármála og eigna er lokið.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

*Dóms- og kirkjumálaráðuneytinu, 13. desember 2002.*

F. h. r.

**Drífa Pálsdóttir.**

---

*Bryndís Helgadóttir.*